

ISIFUNDO:IDRAMA (BUZANI KUBAWO)

Yintoni idrama?

- ❑ Uhlobo loncwadi olubhalwe ngenjongo yokubonisa okulinganiswa eqongeni.
- ❑ Abalinganiswa bayazithethela, besebenzisa intetho-ngqo.
- ❑ Intshukumo idalwa ngabo, ze ifakwe kwizibiyeli.
- ❑ Inencoko phakathi kwabalinganiswa, eye idale ingxoxo.
- ❑ Umongo nomxholo.

AMANQANABA ESAKHIWO SEDRAMA

- Isakhiwo sedrama lucwangciso lweziganeko ezibalulekileyo ezenzeka ebalini ezithi zibe noonobangela neziphumo.
- Ezi ziganeko kufuneka zithungelane ngendlela ephuhlisa umxholo.
- Kwesi sakhiwo kufuneka kukho abalinganiswa abaxambulisana ngombandela othile odala ukungavisisani.
- Izinto ezenziwa ngaba balinganiswa, indlela abathetha, abacinga nabavakalelwa ngayo zinefuthe elibalulekileyo kwisakhiwo sebali.
- Sima ngolu hlobo:

1. INGABULA-ZIGCAWU
2. UKUYONDELELANA KWEZINTO
3. UVUTHONDABA
4. UKUSONJULULWA KWEZINTO
5. ISIPHELO

INGABULA-ZIGCAWU

- Kulapho kuqala khona ibali
- Kuvezwa abalinganiswa abaphambili
- Kuvezwa isimo sentlalo
- Kutyalwa imbewu yempixano
- Uthiwa ntlo ngomxholo webali

Umzekelo

- Kuvulwa nje sixelelwa ngelali yaseZazulwana, umtshato wakwaNgoqo uqhubeka eMgagasi, apho asuka khona uMagaba
- Sidibana noNozipho eqhunyelwa ngumsi, into echaza isimo sentlalo
- Sivezelwa abalinganiswa abaphambili: kwincoko kaMagaba noNozipho engomtshato kuvela igama likaGugulethu nombamba wokuzeka kwakhe. Igama likaThobeka liyavela, apho anconywa ukufaneleka nokuthobeka kwakhe nguMagaba. Kukwavela negama likaNomampondomise
- Ukutyalwa kwezithole zempixano kuvela xa uZwilakhe noMagaba bexelela uGugulethu ngokuba kufuneka ezekile. Le nto ingqamana nokuvunywa kukaGugulethu nguNomampondomise.
- Incoko ingomtshato

UKUYONDELELANA KWEZINTO

- Lelona liba lide ebalini
- Kubakho isiganeko esiza nengxaki
- Kulapho kukhula izithole zempixano
- Undoqo webali ukweli nqanaba
- Kubakho ixhala elidalwa kukuzicingela okunokwenzeka
- Iyakhula impixano
- Abalinganiswa bayohlulelana (Amacala amabini)
- Izimo zabalinganiswa zivela elubala
- Iziganeko ziya zikhula

Umzekelo

- UGugulethu uxelela abazali bakhe ukuba ikhona intombi ayibonileyo
- Abazali bona bamxelela ngentombi kaMcothama
- UGugulethu sele enze isithembiso somtshato esingqingqwa noNomampondomise
- Kwelakhe icala uMagaba ufuna intombi kaMcothama nokuba kumnyama entla: **“Mna zinkosi andikhathali nokuba umntu uchasa ade alale ngomqolo phantsi, ndifuna intombi kaMcothama ize kurhuqa amajalimani kule nkundla nokuba nokuba sekumnyam’entla. Andazi ke ukuba kukho umntu ongalawulwa ade alawulwe nangendlu yakhe.”**
- UZwilakhe ukhonkxwa sisithembiso asenze kuMagaba: **“Hayi Gabakazi, seyikukubuza nje, yena umfana uza kuzeka intombi kaMcothama. Loo nto ndiza kuyimela, andikhathali nokuba umntu sele esithini. Ukuba ndithe uza kuzeka intombi ethandwa ndim, uza kwenza loo nto ke.”**
- UZwilakhe uyimela le nto sele ekwingxoxo nabaninawe bakhe
- UThobeka uyendiswa
- UNomampondomise ukhupha iinkomo zikaMcunukelwa

UVUTHONDABA

- Kweli nqanaba kusencochoyini yebali
- Akukho kubuya ngamva, omabini amacala azijule ijacu.
- Impixano ayisenokuba ngaphezu koku
- Umlinganiswa ophambili kufuneka ethabathe isigqibo, sigqibo eso esinokwenza inguqu.

Umzekelo

- UGugulethu akafuni kuthatha izifungo emtshatweni
- UZwilakhe ubhala ngokwakhe endaweni kaGugulethu
- Umtshato uqhutywa ngendlela engaqhelekanga

UKUSONJULULWA KWEZINTO

- Sisiphumo sokugqibela sebali
- Indlela impixano esonjululwa ngayo
- Kuziwa nesisombululo nokuba nokuba sineziphumo ezikrakra komnye wabalinganiswa abaphambili
- Linqanaba lokukhululwa kwamaqhina
- Izenzo ziguqukela ngakumlinganiswa oyintloko/ ophambili okanye ngakumchasi wakhe

Umzekelo

- Emva kokuba ebone kwiphephandaba ngomtshato kaGugulethu, uNomampondomise umangalela uGugugulethu, aze emva koko aye kuzibulala ngokuzeyelisela emlanjeni.
- Umama kaNomampondomise uyawa abhubhe
- UGugulethu uyazila, afulathele ikhaya (iminyaka eli-12)
- UZwilakhe uthumela uThobeka nabantwana bakhe (aba-3) kuGugulethu
- UGugulethu ubulala uThobeka nabantwana bakhe
- UGugulethu uya kuzinikezela emapoliseni

ISIPHELO

- Owoyisakeleyo ucaca nakuthathatha
- Kulungiswa imbangi yembambano (Kucaca isiphelo sempixano)
- Umlinganiswa oyintloko uzibona le nto ayiyo
- Kubakho isiphelo esiyintlekele okanye esiyolisayo
- Kuvela eyona njongo yokubhalwa kwedrama

Umzekelo

- UZwilakhe woyisakele
- Ijaji iwisa isigwebo sokuxhonywa kukaGugulethu
- UZwilakhe uyazisola , ucela ukuba kuxhonywe yena endaweni kaGugulethu.
- UMagaba usela ityhefu, afe
- Kuphuhla injongo yokubhalwa kwale drama: kuvezwa ubungozi bokunyanzeliswa kwesiko eliphelwe lixesha. Kufa abantu abangenatyala ngenxa yolu nyanzeliso.